

# FunFoosballTeam Tögge ABC

Wenns um töggele goht, wird immer viel gfroget und s werded no viel meh viel Tipps geh. Üsern wichtigste Tipp gemmer gad mol vorweg: MACH EN TRICK!

Im Ernst: Stelled Froge und sammled ganz viel Informatione (Tipps), probiered us und mached alles so, wiäs eu am beste goht. Bzw. sorry – da isch nur dä zweitwichtigst gsi – dä mit Abstand aller-aller-aller wichtigst Tipp isch dä: Probier dä Spass am Spiel nöd zverlüüre, Rückschlag ghöred dezue – chasch jede einzel froge wo töggelet. Jede hät scho wölle ufhöre :).

Im Internet findet mer ganz viel Informatione, was mer wiä sött machä bim töggele. Paar vom FFT wo scho länger spieled hend sich überleit, dass mer für diä vo eu wos interessiert mol öppis zämä stelled, wo so chli die wichtigste Sachä vom töggele abdeckt.

## **Stürmer – Mittelfeld (Füferspiel uf dä 3er)**

1. Spiel nie schnell – egal wo dä Ball gad isch. S Ziel mue sii, dasst jede Ball wot mit mä Töggele am 5er chasch erreiche chasch kontrolliere (=stoppe) und zu dir hole. Denn nimmsch dä Ball und probiersch en uf dä 3er spiele.
2. Loh der Ziit und konzentrier di. Probier dä Ball bim Pass uf dä 3er mit möglichst wenig „ushole“ zschüsse (muesch mol usprobieren - wenn dä Ball wiit hine liit, muesch fast gar nöd schüsse). Ziel mue sii, dasst zwei verschieden Pass-Optione häscht, wo beidi am Aafang (bzw. möglist lang während dä Bewegig) gliich ussehnd.

## **Stürmer – Sturm (Drüuer)**

1. Kontrollier dä Ball und loh der Ziit. Konzentrier di uf din Schuss. Überleg der, wa dä Goali macht und wo er gad stoht.
2. S wichtigste isch, dasst möglichst jede Ball ufs Goal bringsch. Egal wele Schuss dasst machsch (Snake, Pin, Zücher/Stosser) – probier dä Schuss ganz in Egge z tröffe. Erst wenn en Snake oder en Pin chasch „wiit in Egge“ schüsse, chasch dä Schuss... isch Üebigsach!

## **Goali – in Ballbsitz**

1. Loh der Ziit und kontrollier dä Ball. Ziel mue sii, dass dä Ball überd Mittellinie goht – alles ander isch unwichtig. Ballverlust sind Gift. Super isch notürli, wenn dä Ball ufs Goal (oder ufd Deckig vom gegnerische Verteidiger) gschosse wird, damit dä Ball zum Stürmer goht.
2. Loh möglichst kei Abpraller zue und hol jede Ball, wo dur dis Drittel flüügt. Isch Üebigsach – und git vielleicht am Aafang mengmol s eine oder andere Eigegoal. Wenn guet bisch i dem, isch da Gold wert!

## **Goali – ohni Ball – Ball bim gegnerische Stürmer**

Bäll vom gegnerische Stürmer hebe isch Bonus – s isch voll egal, wenn jede inegoht. Du häscht 4 halbi Töggele (aso 2 ganzi) und mit jedem halbe chasch en Ball abwehre. Da heisst, du chasch mit 2nä Töggele 4 "Ball-Breitene" abwehre. Jetzt heisst usprobieren... us üserer Sicht s wichtigste isch:

1. Blieb mit Goali und Verteidiger in Bewegig.
2. Gradus söttsch dä Stürmer möglichst nöd schüsse loh. Probier dä am Stürmer niä z schenke.
3. Überleg der, wele Schuss dä Stürmer am beste cha. Nimm ihm dä weg – mach dass er dä möglichst nöd cha schüsse, bzw. dass du möglichst viel döte bisch, wo sin beste Schuss amel chunnt.
4. Fahr nöd zu wiit use mit dä Töggele. Wenn ganz in Egge fahrsch, „verschenksch“ en halbe Ball wo eigentli chönnt zwüscht Stürmer (Ball) und Goal stoh. Nur die usserst Zeche-Spitze vom Goali oder Verteidiger sött im Egge stoh, sodass kein Ball meh Platz hät (usprobieren und üebe ;)).

## **Deckige (gegnerische Goali)**

Wenns drum goht, Schüss vom gegnerische Verteidiger z blocke, gits 3 verschieden Aasätz. Alli hend ihri Stärkene und Schwächene:

1. De Goali nimmt dä nööch Egge, dä Stürmer dä wiit...  
Wenn en Goali gern in nööche Egge zücht oder schiebt cha da wirkigsvoll sii... wenn en Goali richtig schnell wiit cha schiebe oder züche, wirds gführlich ;).
2. De Goali nimmt dä wiit Egge, dä Stürmer dä nööch...  
Wenn en Goali stark wiit zücht oder schiebt cha da wirkigsvoll sii...
3. Dä Stürmer nimmt alles und dä Goali nimmt alles (Goali-War)  
Beidi spekuliered voll – dä Goali positioniert sich abhängig vo dem wo dä Stürmer deckt (oder äbä nöd). Ä super Deckig zum Druck machä uf dä gegnerische Goali (Föteli). Achtung! Dä Stürmer mues möglichst immer suber im „Drüeck“ stoh... (Stürmer suber zwüscht 2nä Mittelfeldspieler, au wenn mer sich bewegt!)